

編號 05 號

【杌仔樹】張瑞玲原作

吾田項種有一頭杌仔樹，恬恬企在牆頭下，因為無時間好知理¹佢，就放佢在該天生天養。毋過，佢也真增志²，不時都看得著佢開花、打子，加減有兜仔收成好分佢罔食。

有一日，一個打林種果子个朋友來坐寮，眯著³這頭杌仔，大咻一聲：「你實在真打爽人个東西！無採人个杌仔！放佢在該也無去知理佢！」聽佢講吔，佢頭那皮緊爪，毋知愛應佢麼个正好。

就恁樣，本來係來坐寮个朋友，這下嘎變做吾个杌仔先生咧。佢定定仔教，佢慢慢仔學。學歸下晝仔，正知杌仔樹毋係放佢緊綻新葉就會開花；愛定期修剪、放肥料。剪極也毋係儘採、濫糝剪；忒幼个毋會打，愛剪忒；衝心个若放佢生到忒高，另擺異艱辛摘，毋好留……。單淨留該生往出、平平个極就好，又還講：「一極留一粒就好，毋好毋盼得，係無另擺打个子，總下細細粒仔又壞食。」又教佢哪央時愛刪⁴花苞、果子幾大該下愛刪粒、生來正當个杌仔子愛留等、歪歪孬孬个愛刪忒……。佢聽到嘴擘擘仔、頭暈腦疼，除

忒領頭以外，麼个話都應毋出。無想著，一頭細細頭个杌仔樹，有恁多學問哪！

朋友愛離開進前，還交代：「佢今晡日教你剪極剪好哩啲，五個半月了後，佢愛來食若杌仔哦！」為著無想愛在朋友面前落櫃⁵，這下，這頭杌仔嘎變到佢下班了後个頭項事頭咧！逐日都愛去田項巡佢一下、遶佢一下。毋係剪刀擎等剪極，無就淋水、落肥料。有一日下晝頭，行到田項，遠遠看著歸樹白蓬蓬，算算啊，怕有歸百蕊花哦！

一日等過一日，總算等到花殷忒，結著一粒比手指尾頭截較細个杌仔子；又等啊等，等到杌仔子較大粒咧，恁起朋友吩咐个：「若係兩、三粒生共下，愛刪忒伸一粒就好！」毋過，三粒平大平大，緊看緊毋盼得，刪忒實在打爽，留等好啦！

日見日，杌仔子一日一日看等佢大，當初時毋聽話留等个，這下嘎極共下⁶，極著个所在靠著⁷，總下食毋得，三粒都愛摘忒。有這擺个教訓，包尾旨大个，佢就乖乖仔聽人講，一極留一粒就好。

跔等，有好大粒哩啲，就買網仔同袋仔同佢包起來。看著歸樹包到累累墜墜⁸，吾心肝肚想：「等兩個月過後，朋友來驗收成果，應該毋會落櫃正著啦！」

¹ 知理：音 zii' li'；養護整理。

² 增志：音 zen zii；積極進取之意。

³ 眯著：音 lai' do'；不經意的看見。

⁴ 刪：音 xien'；修整枝條。

⁵ 落櫃：音 lau kui；出糗、出洋相。

⁶ 極共下：音 kid kiung ha；擠在一起。

⁷ 靠著：音 ko do'；挨近而磨擦到。

⁸ 累累墜墜：音 lui' lui' cui cui；形容果實累累成串垂下的樣子。